



門武
第 176
卷 17



孫真人千金方衍義卷十二

長洲張璐路玉著

南沙席世臣郢客校

膽腑方 凡七類

膽腑脈論第一 論一首

論曰膽腑者主肝也肝合氣於膽膽者中精之腑也

難經云膽者清淨之腑甲乙云中精之腑號將軍決曹吏重三兩三銖長

三寸三分在肝短葉間下貯水精汁二合難經作三合能

怒能喜能剛能柔目下果大其膽乃橫凡膽腦髓骨

脈女子胞此六者地氣之所生也皆藏於陰而象於

地故藏而不瀉名曰奇恒之腑若胃大腸小腸三焦膀胱此五者天氣之所生也其氣象天故瀉而不藏此受五臟濁氣名曰傳化之腑此不能久留輸瀉者也所謂五臟者藏精氣甲乙作神而不瀉故滿而不能實六腑者傳化物而不藏故實而不能滿所以然者水穀入口則胃實而腸虛食下則腸實而胃虛故曰虛而不滿滿而不實也

左手關上陽絕者無膽脈也若膝疼口中苦眯目善畏如見鬼多驚少力刺足厥陰治陰在足大趾間或刺三毛中左手關上陽實者膽實也若腹中不安身

軀習習也刺足少陽治陽在足上第二趾本節後一寸是

膽病者善太息口苦嘔宿汁心澹澹恐如人將捕之咽中介介然數唾候在足少陽之本末亦見其脈之陷下者灸之其寒熱刺陽陵泉若善嘔有苦長太息心中澹澹善悲恐如人將捕之邪在膽逆在胃膽液則口苦胃氣逆則嘔苦汁故曰嘔膽刺三里以下胃氣逆刺足少陽血絡以閉膽却調其虛實以去其邪也

膽脹者脇下痛脹口苦太息

肝前受病移於膽肝欺不已則嘔膽汁

厥氣客於膽則夢鬪訟甲乙云夢鬪訟自剗

肝應筋爪厚色黃者膽厚爪薄色紅者膽薄爪堅色

青者膽急爪奕色赤者膽緩爪直色白無約者膽直

爪惡色黑多敗者膽結

扁鵲云足厥陰與少陽為表裏表清裏濁其病若實

極則傷熱熱則驚動精神而不守臥起不定若虛則

傷寒寒則恐畏頭眩不能獨臥發於元水其根在膽

先從頭面起腫至足方見治水篇中

膽有病則眉為之傾病人眉系傾者七日死

足少陽之脈是動則病口苦善太息心脇痛不能反

側甚則面微塵體無膏澤足外反熱是為陽厥是主

骨所生病者頭痛角頷痛目銳眦痛缺盆中腫痛腋

下腫馬刀挾癭汗出振寒瘧胸中脇肋髀膝外至脘

絕骨外踝前及諸節皆痛小指次指不用盛者則人

迎大一倍於寸口虛者則人迎反小於寸口也其經脈

筋支別已具第十卷肝臟部中

膽虛實第二脈二首灸法二首方九首

膽實熱

左手關上脈陽實者足少陽經也病苦腹中氣滿飲

食不下咽乾頭痛灑灑惡寒脇痛名曰膽實熱也

半夏湯 治膽腑實熱精神不守瀉熱方

半夏

宿薑 各三兩

黃芩 一兩

生地黄 五兩

遠志

茯苓 各二兩

秫米 一斗

酸棗 五合

右八味咬咀以千里長流水五斗煮秫米令蟹目

沸揚之干餘遍澄清取九升煮藥取三升半分三

服 集驗方治虛煩悶不得眠無地黃遠志有麥門冬桂心各三兩甘艸人參各二兩

衍實則邪氣之湊熱則陽氣之併千金半夏湯本乎

善靈樞治陽氣盛滿不得入於陰陰虛則目不瞑故

用半夏滌除痰涎秫米滋培氣化加宿薑茯苓佐

上二味潔淨膽腑生地黄滋水制陽棗仁斂津化

熱黃芩外疏風木遠志內通壯火逐流水以下趨

是可無藉葦薪之炊矣

膽虛寒

左手關上脈陽虛者足少陽經也病苦眩厥痿足指

不能搖躄不能起僵仆目黃失精眈眈名曰膽虛寒

也

溫膽湯 治大病後虛煩不得眠此膽寒故也宜

服之方

半夏

竹茹

枳實

各二兩

橘皮

三兩

甘艸

一兩

生薑

四兩

右六味咬咀以水八升煮取二升分三服

一本有茯苓二

兩紅棗十二枚

衍義

虛則膽氣不充寒則痰氣搏聚故用薑半溫膽枳

茹清中甘橘鼓舞陽和開發陰凝之寒寒則痰陰

之通稱 詳半夏溫膽二湯一治實熱一治虛寒

總為濁陰阻積不能行清淨之令是以主治不出

滌飲為務而實熱反用秫米遠志虛寒反用竹茹

枳實者蓋實非膽腑之本實故需流水煮秫米以

通陰陽遠志統地黃以散實熱乃補中寓泄之法

虛寒用半夏佐生薑以散積飲竹茹輔枳實以治

旺氣旺氣除而正氣自復膽腑自溫乃瀉中寓補

之法非千金不能體內經之奧而衍無上甚深微

妙也

千里流水湯 治虛煩不得眠方

麥門冬

半夏

各三兩

茯苓

四兩

酸棗仁

二升

甘艸

桂心

黃芩

遠志

草薺

人參

生薑

各二兩

秫米

一斗

右十二味咬咀以千里流水一斛煮米令蟹目沸揚萬遍澄清取一斗煮取二升半分三服

衍義

虛煩乃津液耗散病在膈上故於半夏湯中除去生地黄之沉降棗仁四倍以溫膽腑加人參甘艸門冬以滋津液草薺入肝搜風桂心佐遠志達腎以通陰陽汗出乃已靈樞法外法也

酸棗湯

治虛勞煩擾奔氣在胸中不得眠方

酸棗仁

五升

人參

桂心

生薑

各二兩

石膏

四兩

茯苓

知母

各三兩

甘艸

一兩半

右八味咬咀以水一斗先煮棗仁取七升去滓下藥煮取三升分三服日三

衍義

金匱酸棗湯治虛勞虛煩不得眠此治奔氣在胸中故退芎藭而進桂心加人參助茯苓以降逆氣石膏佐知母以泄虛煩生薑辛散以行知母石膏之性也

治虛勞煩悶不得眠方

大棗

二十七枚

葱白

七莖

右二味以水三升煮取一升去滓頓服

衍義

風熱之邪欲犯膽腑而煩悶不得眠者取葱白以

通陽氣大棗以安中精也

梔子湯 治大下後虛勞不得眠劇者顛倒懊懣

欲死方

仲景云發汗吐下後虛煩不得眠若劇者必反覆顛倒心中懊懣梔子湯主之

大梔子

十四枚

豉 七合

右二味以水四升先煮梔子取二升半內豉更煮

三沸去滓每服一升安者勿更服若上氣嘔逆加

橘皮二兩亦可加生薑二兩

衍義

下後虛煩懊懣不得眠用梔子以清膈上虛煩香

豉以治心下懊懣

治煩悶不得眠方

枸杞白皮

生地黃

各五兩

麥門冬

甘艸

前胡

各三兩

茯苓

知母

各四兩

人參

二兩

粟米

豉

各半升

右十味咬咀以水八升煮取三升七合分四服

衍義

香豉前胡以辟膈上之煩地骨地黃門冬知母以

清心下之熱人參茯苓甘艸粟米以安中州之氣

人參白虎湯中除去石膏略兼七珍之製正氣得

補則虛煩自除

治虛勞不得眠方

酸棗仁

榆葉 等分

右二味為末蜜丸如梧子每服十五丸日再

衍義棗仁溫膽腑而生津榆葉疎風木而利竅膽氣安

而眠自穩矣

又方

乾薑四兩為末湯和頓服覆取汗愈

衍義陽被陰埋煩不得眠則以乾薑之辛溫服取汗以

發越陽氣煩悶自己眠臥自寧

灸法

膽實熱灸濁浴隨年壯穴在俠膽踰傍行相去五寸

膽虛寒灸三陰交各二十壯穴在內踝上一尺

咽門論第三 誦一首

論曰夫咽門者應五臟六腑往來神氣陰陽通塞之道也喉嚨胞囊舌者並津液調五味之氣本也不可
不研乎喉門者肝膽之候也主通五臟六腑津液神
氣應十二時若臟熱則咽門閉而氣塞若腑寒則咽
門破而聲嘶母薑酒主之 方見六卷 熱則通之寒則
補之若寒熱調和病不生矣

髓虛實第四 論一首 方二首

論曰髓虛者腦痛不安髓實者勇悍凡髓虛實之應

千金方衍義卷三
主於肝膽若其腑臟有病從髓生熱則應臟寒則應腑

羌活補髓丸 治髓虛腦痛不安膽腑中寒方

羌活

芎藭

當歸 各三兩

桂心 二兩

人參 四兩

棗肉 研如脂

羊髓

酥 各一升

牛髓

大麻仁

各二升熬研如脂

右十味先搗五種乾藥為末下棗膏麻仁又搗相濡為一家下二髓并酥內銅鉢中重湯煎取好為丸如梧子大酒服三十九日二服稍加至四十九

衍義

補髓而用羌活之走督脈桂心之溫髓臟芎藭之

逐腦風當歸之潤血脈麻仁之滋津液乳酥牛羊髓之透骨髓參棗之溫脾氣脾氣溫而髓腑完固腦病自安然必其人素稟虛寒精血不充頭腦為風火往來之熱徑故立此方設無腦病不安專補髓虛又當從事八味腎氣等治矣

柴胡發泄湯

治體實勇悍驚熱主熱方

柴胡

升麻

黃芩

細辛

枳實

梔子仁

芒硝

各三兩

淡竹葉

生地黃

各一升

澤瀉 四兩

右十味咬咀以水九升煮取三升去滓下硝分三服

衍義

髓臟有虛無實有補無瀉而此專用發泄以折強暴之威升麻柴胡發之於上枳實芫硝泄之於下黃芩梔子佐升柴為開發之上使竹葉澤瀉佐枳硝為分泄之下使獨取地黃保護真陰以制亢陽細辛引入中精以通疎泄然必其所稟偏陽壯火食氣勇悍過甚或熱遺精竅疼楚不寧故勒是方設腎氣本強當無驚熱之患即使水虧火旺又

當從事六味都氣等治矣

風虛雜補酒煎第五 方十九首

巴戟天酒 治虛羸陽道不舉五勞七傷百病能

又食下氣方

巴戟天

牛膝 各三升

枸杞根白皮

麥門冬

地黃

防風 各二斤

右六味並生用卒無生者用乾者亦得咬咀以酒一石四斗浸七日去滓溫服常令酒氣相續勿至醉吐慎生冷猪魚油蒜春七日秋冬二七日夏勿服先患冷者加乾薑桂心各一斤好忘加遠志一

斤大虛勞加五味子菴蓉各一斤陰下濕加五加
根皮一斤有石斛加一斤佳每加藥一斤卽加酒
七升此酒每年九月中旬卽合入十月上旬卽服
設服餘藥以此酒下之大妙滓曝乾搗爲末以此
酒服方寸七日三益生常加甘艸十兩佳虛勞加
黃芪一斤

又方

巴戟天

生牛膝

各三斤

右二味咬咀以酒五斗淹浸服如前法

五加酒 治虛勞不足方

五加皮

枸杞根白皮

各一斗

右二味咬咀以水一石五斗煮取汁七斗分取四
斗浸麴一斗餘三斗用拌飯下米多少如常釀法
熟壓取服之多少任性禁如藥法倍日將息

衍義

上方雜補風虛不獨主陽事萎頓也方中巴戟天
益精壯陽牛膝強筋通髓枸杞根退邪火堅筋骨
麥門冬補脉虛滋津氣生地黃治陰虛相火熾盛
防風理脾衰內濕招風漬酒本無定方不妨隨証
增減 又方巴戟天生牛膝單取二味釀酒惟精
氣固密者宜之 極勞傷肝五加皮酒專主勞傷

不足故凡勞傷六極槩列於左

天門冬大煎 治男子五勞七傷八風十二痺傷

中六極 一氣極則多寒痺腹痛喘息驚恐頭

痛 二肺極則寒痺腰痛心下堅有積聚小便

不利手足不仁 三脈極則顏色苦青逆意喜

恍惚失氣狀似悲泣之後苦舌強咽喉乾寒熱

惡風不可動不嗜食苦眩喜妄言 四筋極則

拘攣小腹脹心痛膝寒冷四肢骨節皆疼痛

五骨極則肢節厥逆黃疸消渴癰疽妄發重病

浮腫如水病狀 六肉極則發疰如得擊不復

言甚者至死復生衆醫所不能治此皆六極七

傷所致非獨房室之謂也憂恚積思喜怒悲歡

復隨風濕結氣咳時嘔吐食已變大小便不利

時泄利重下溺血上氣吐下乍寒乍熱臥不安

席小便赤黃時時惡夢夢與死人共飲食入塚

神室魂飛魄散筋極則傷肝傷肝則腰背相引

難可俯仰氣極則傷肺傷肺則小便有血目不

明髓極則陰痿不起住而不交骨極則傷腎傷

腎則短氣不可久立陰疼惡寒甚者卵縮陰下

生瘡濕癢搔不欲住汁出此皆爲腎病甚者

多遭風毒四肢頑痺手足浮腫名曰脚弱一名脚氣醫所不治悉主之方

天門冬

生地黄

各切三斗半搗壓盡取汁

白蜜三升

酥三升

枸杞根

切三斗淨洗以

水一石五斗煮取一斗三升澄清

麝骨

一具搗碎以水一石

煮取五斗澄清

右六味並大斗銅器中微火先煎門冬地黄減半乃合煎取大斗二斗下後件散藥煎取一斗內銅器重釜煎令隱掌可丸如梧子大平旦空腹酒服二十九日二加至五十九日慎生冷醋滑猪鷄魚蒜

油麵等須擇四時王相日修合其合和一如第一

卷和合篇說散藥如左

茯苓

桂心

白米

萎蕤

五加皮

菖蒲

遠志

澤瀉

薯蕷

柏子仁

人參

石斛

牛膝

杜仲

覆盆子

細辛

獨活

枳實

芎藭

大豆黃卷

黃芪

肉蓯蓉

續斷

狗脊

胡麻子

草薺

白芷

橘皮

茯神

巴戟天

石南各二兩

阿膠十兩

甘艸六兩

蜀椒

薏苡仁各一升

大棗一百枚 煮作膏

鹿角膠五兩

蔓荊子三兩

右三十八味治下節內煎中有牛髓鹿髓各加三升大佳小便澀去柏子仁加秦艸二兩乾地黄六兩陰痿失精去萎蕤加五味子二兩頭風去柏子仁加菊花防風各二兩小便利陰氣弱去細辛加山茱萸二兩腹中冷加乾薑二兩無他疾依方修

合凡此煎九月下旬採藥立冬日合服至五月上旬止若十二月臘日合者經夏至七月下旬止若停畱經夏不壞當於舍北陰處入地深六尺填沙置藥中上加沙覆之則經夏不損也女人先患熱者得眠患冷者勿服

衍義

方中彙聚補肺氣散寒痺通血脈堅筋骨益精體充肌肉諸品可謂詳矣方後更添加減諸法雖諸虛頑痺手足浮腫風毒脚氣咸可取服要非專療之方其後女人患冷者勿服詳後散中雖多温煖之品不敵先煎天冬生地之大劑甘寒且埋陰處

日久恐礙生盲故也

填骨萬金煎 治內勞少氣寒疝裏急腹中喘逆

腰脊痛方

生地 三十斤 取汁

肉蓯蓉 甘草

阿膠 各一升

麥門冬 乾地黄 各一斤

乾薑

桑白皮

茯苓

桂心 各半斤

人參

桔梗

五味子

附子 各五兩

石斛 一斤 五兩

牛髓 一斤

白蜜 十斤

清酒 四斗

麻子仁 三升

大棗 一百五十枚

當歸 十四兩

乾漆 二十兩

蜀椒 四兩

右二十三味先以清酒二斗六升內桑根白皮麻子仁棗膠為刻識之又加酒一斗四升煮取至刻絞去滓內蜜髓地黄汁湯上銅器煎內諸藥末半日許令可丸止大甕盛飲吞如彈丸一枚日三若夏月暑熱煮煎轉味可以蜜與地黄汁和諸藥成丸如梧子服十五丸不知稍加至三十九

衍義

前天門冬大煎雖統治勞傷六極究其所主腎病居多此方專主填補骨髓而於大煎方中採取溫補藥味參入椒附之辛烈故可兼治寒疝裏急等

疾

又方 治男子風虛勞損兼肺氣方

甘艸 一斤

石斛

防風

菴蓉

山茱萸

茯苓

人參

薯蕷

桂心

牛膝

五味子

兔絲子

巴戟天

芎藭

生地骨皮

生地黄汁

丹參

生麥門冬汁

牛髓

白蜜

生薑汁

胡麻

以水二斗煮取四升去滓各二升

右二十二味先煮地黃地骨皮胡麻汁減半內牛髓蜜薑門冬等汁微火煎餘八升下諸藥散和令調內銅器中湯上煎令可丸如梧子大酒服三十丸日二加至五十九

衍義

此治男子風勞虛損雖用防風入於參苓冬地菴蓉五味丸劑中僅可疎通藥性法無散邪之方也

小鹿骨煎

鹿骨一具

治一切虛羸皆服之方

鹿骨

碎一具

枸杞根

切二升

右二味各以水一斗別器各煎汁五升去滓澄清乃合一器同煎取五升日二服盡好將慎皆用大

斗

地黃小煎 治五勞七傷羸瘦乾削方

乾地黃末一升 胡麻油半斤 蜜二升

猪脂一斤

右四味銅器中煎令可丸如梧子大飲服三九日
二稍加至十九久久常服大有所益瘦黑者肥充
陸抗膏 治虛冷枯瘦身無精光虛損諸不足方

牛髓各二升 羊脂各二升 酥經心錄用猪脂

生薑汁各三升 白蜜各三升

右五味先煎酥令熟次內薑汁次內蜜次內羊脂

牛髓後微火煎三上三下令薑汁水氣盡即成膏
攪令凝止溫酒服隨人能否不限多少令人肥健

發熱也經心錄云治百病勞損風濕補益神効男女通可服之良

枸杞煎 補虛羸久服輕身不老神驗方

九月十日取生濕枸杞子一升清酒六升煮五
六沸出取熟研濾取汁令其子極淨曝令乾搗
末和前汁微火煎令可丸酒服二方寸七日二
加至三七亦可丸服三十丸

夏姬杏仁煎方太上肘後玉經方名杏金丹

杏仁三升內湯中去皮尖雙仁熟搗盆中水研

取七八升汁以鐵釜置煆火上取羊脂四斤就釜內磨消內杏仁汁溫之四五日色如金狀飢如彈子日三服百日肥白容易人不能識也

又方

杏仁去皮尖熬黃搗服如梧子日三治枯瘦令人潤澤無所禁 咳逆上氣喉中百病心下煩不得咽物者得茯苓欵冬紫苑并力大良 其藥生熟熟冷喉中如有息肉者亦服之

桃仁煎方

桃仁 末

蜜 各一升

酥 半斤

胡麻 一升 末

牛乳 五升

地黃 十斤 取汁

右六味合煎如飴旋服之

治五勞七傷方

白羊頭蹄

一具淨治以草火燒令黃赤以淨綿急塞鼻及腦孔

管胡椒

葶苈

乾薑

各一兩

葱白

一升

豉

二升

右七味先以水煮頭及蹄半熟卽內藥煮令極爛去藥冷煖任性食之日一具七日凡七具忌生冷

酢滑五陳

治虛勞補方

羊肚 一具切

白朮 一升

右二味以水二斗煮取六升每服二升日三為度

又方

豉 一升蒸三遍

薤白 一斤切

右二味以水七升煮取三升分三服小取汗

膏煎 治虛羸瘦方

不中水猪肪煎取一升內葱白一握煎令黃出內盆中平旦空腹服訖煖覆臥至脯時食白粥粥不得稀過三日服補藥方如左

羊肚 一具

羊脊膂肉 一條

麩 末半斤

枸杞根 十斤

右四味以水三斗煮枸杞取一斗去滓細切肚等內汁中煮著葱豉鹽如羹法合煎看如稠糖即好食之七日禁如前法

補虛方

猪肚 一具

人參 五兩

蜀椒

乾薑

各二兩半

葱白 七兩

白梁米

半升翼用粳米

右六味哎咀諸藥令相得和米內肚中縫合勿令泄氣取水四斗半緩火煮爛空腹食之大佳兼下少飯

衍義

小鹿骨煎助陽壯骨 地黄小煎滋陰潤燥 陸

抗膏充髓補虛 枸杞煎搜風逐濕 夏姬杏仁

煎溫脂豐肉 核桃仁煎等藥兼調血氣 白羊

頭蹄和椒薑葱豉溫養百骸 羊肚白朮專培脾

氣 香豉薤白開泄痺著 膏煎補益虛羸 補

虛方專補脾胃陽氣藉葱白以通少陽生發之氣

吐血第六 論一首 方二十九首 鍼灸法十五首

論曰稟五云吐血有三種有內衄有肺泄有傷胃內
衄者出血如鼻衄但不從鼻孔出是近從心肺間津
液出還流入胃中或如豆羹汁或如切齧血凝停胃

中因卽滿悶便吐或去數升至三斗者是也得之於
勞倦飲食過常所爲也肺沮者或飲酒之後毒滿悶
吐之時血從吐後出或一合半升是也傷胃者因飲
食大飽之後胃中冷則不能消化不能消化便煩悶
強嘔吐使所食之物與氣其上衝蹙因傷裂胃口吐
血色鮮正赤腹絞痛自汗出其脈緊而數者爲難治
也問曰病胸脇支滿妨於食病至則先聞腥臊臭出
清液先唾血四肢清目眩時時前後血病名爲何何
以得之對曰病名血枯此得之年少時有所大奪血
若醉入房中氣竭而肝傷故使月事衰少不來也治

以烏劔骨蔞茹二味并合丸以雀卵大如小豆以五
丸爲後飯飲以鮑魚汁利腸中及傷肝也凡吐血後
體中但自惓惓然心中不悶者輒自愈假令煩躁心
中悶亂紛紛嘔吐顛倒不安醫工又與黃土湯阿膠
散益加悶亂卒致不濟如此悶者當急吐之方

瓜蒂二分

杜衡

人參各一分

右三味治下篩服一錢七或無水漿但得下卽可
羸人小減之吐去青黃或吐血一二升無苦

衍義吐血雖有三種之分而委積鬱發則一內衄得之
勞倦所傷血從心肺流入於胃肺沮得之飲酒過

劇血從吐出傷胃得之飲食過飽衝激損裂雖病
關肺胃總由肝傷不能藏血膽氣逆滿而上是以
列之膽腑更有房勞氣竭肝傷內有乾血而吐後
煩躁悶亂嘔吐不安者必然所吐未盡急當以杜
衡開結導滯人參助胃祛邪鼓舞瓜蒂上涌之力
然後用黃土湯阿膠散柏葉湯四烏劔一蔞茹丸
等方方合病情始無妨礙

黃土湯 治吐血方

伏龍肝

雞子大一枚

桂心

乾薑

當歸

芍藥

白朮

甘艸

阿膠

芎藭

各三兩

生地黄

八兩

細辛

半兩

吳茱萸

半升

右十二味咬咀以酒七升水三升合煮取三升半去滓內膠煮取三升分三服亦治衄血

又方 治卒吐血及衄血方

伏龍肝

八兩

甘艸

乾薑

仲景作附子

白朮

阿膠

黃芩

各三兩

右六味咬咀以水一斗煮取三升去滓下膠分三

服 仲景有乾地黄八兩

衍義按金匱黃土湯治先便後血此必傳寫之誤以陽

衰不能統陰故血先便而下經云陰絡傷則血內溢因陰絡傷則營血不能循經而轉少陽之樞乃下走二腸故宜黃土附子以溫水土二臟也千金取治內衄於本方中除去附子黃芩參入薑桂萸辛佐伏龍肝以散結芎藭芍藥佐膠地以和營以無附子之雄烈且有地黄之滋血故無藉於黃芩也又方除去附子地黄加入乾薑以溫中散結仍佐黃芩以散少陽之風熱也 金匱黃土湯惟附子一味難於槩投所以千金改用乾薑相配地黄深得陰陽兼濟之妙必集方時偶失此味決非故

為裁去也設見血色晦淡則為陽不統陰附子又為必需

生地黄湯 治憂恚嘔血煩滿少氣胸中痛方

生地黄 一斤 大棗 五十枚 阿膠

甘艸 各三兩

右四味咬咀以水一斗煮取四升分四服日三夜

一

衍義

方下雖治憂恚嘔血而實肺沮吐血之的方酒氣逆滿則肝浮膽橫每致動肝悖亂生地黄治傷中血痺阿膠主心腹內崩甘艸和臟腑寒熱大棗平

胃氣安中藉此以統地黄歸就丹田以資少陽生發之氣也

堅中湯 治虛勞內傷寒熱嘔逆吐血方

藥糖 三斤 芍藥 半夏

生薑 各三兩 甘艸 各三兩 桂心 二兩

大棗 五十枚

右七味咬咀以水二斗煮取七升分七服日五夜

一翼方無甘草桂心有生地黄

衍義

堅中者中氣為飲食所傷痰血搏聚於胃故用小建中加半夏以滌涎垢易桂心以散結血中氣清

淨而膽腑攸寧矣

治噫止唾血方

石膏 四兩

厚朴 三兩

麻黃

生薑

五味子

半夏

杏仁 各二兩

小麥 一升

右八味咬咀以水一斗煮麻黃去沫澄取七升內藥煮取二升半分再服

衍義 虛氣上逆所以噫氣不除今噫止唾血必是肝膽之氣鬱發而反動血故用厚朴麻黃杏仁開發肺氣於上生薑半夏請理痰氣於中更以石膏疎泄

胃熱五味收斂虛逆小麥補益肝氣不獨滋麻朴之散兼斂虛氣之逆陰隨陽運不須更用血藥也治吐血胸中塞痛方

芍藥

乾薑

茯苓

桂心

當歸

大黃

芫硝 各三兩

阿膠

甘艸

人參 各二兩

麻黃 一兩

乾地黃 四兩

蠱蟲

水蛭 各八枚

大棗 二十枚

桃仁 一百枚

右十六味咬咀以水一斗七升煮取四升分五服

日三夜二

衍義胸中陽位非陰邪留結之處但塞痛又非無形氣

病詢為血隨氣奔而留薄於上故用麻黃硝黃開

泄上下薑桂蟲蛭散堅攻積參苓甘棗膠歸芍地

桃仁平調氣血以助破血之力也

柏葉湯 治吐血內崩上氣面色如土方

乾薑

阿膠

柏葉各二兩

艾一把

右四味咬咀以水五升煮取一升內馬通汁一升

煮取一升頓服

仲景不用阿膠小品肘後俱不用柏葉

衍義陰邪留積於陽位所以胸滿吐血千金乃祖金匱

柏葉湯取柏葉以清肝火乾薑以開胸滿艾葉以

散陰結馬通以逐瘀滯更加阿膠以治內崩寒熱

兼濟補瀉兼施之妙無逾於此

治吐血酒客温疫中熱毒乾嘔心煩方

蒲黃

犀角

栝蒌根

甘艸各三兩

葛根

桑寄生各三兩

右六味咬咀以水七升煮取三升分三服

衍義犀角蒲黃治吐血毒熱栝蒌甘艸主乾嘔心煩葛

根桑寄生為酒客失血之專藥即感温疫毒邪亦

不出此但寄生真者絕不易得昔人以蘆根汁代用亦頗有效

澤蘭湯 治傷中裏急胸脇攣痛欲嘔血時寒時熱小便赤黃此皆傷於房勞故也

澤蘭

糖各一斤

桂心

桑根白皮

人參各二兩

遠志一兩

生薑五兩

麻仁一升

右八味咬咀以醇酒一斗五升煮取七升去滓內糖食前服一升日三夜一勿勞動

衍

房勞氣竭肝傷非壯其中氣雖破血而血不除清

火而火不散故用人參膠飴以滋澤蘭桂心之清血桑皮麻仁以滋遠志生薑之利竅尤妙在酒煮以通血脈濡滯也

治忽吐血一二口或是心衄或是內崩方

蟬螬五枚

牛膝生

王不留行

牡丹

麥門冬各二兩

革薺

芍藥

乾地黄各四兩

續斷

阿膠各三兩

右十味咬咀以生地黃汁五升赤馬通汁三升煮取三升分三服不瘥更合數劑取瘥止

又方

熟艾三雞子許水五升煮取二升頓服

又方

燒亂髮灰水服方寸七日三服

集驗云治舌上
忽出血如簪孔

者亦治小
便出血者

治虛勞吐血方

生地黃肥者五升搗以酒一升煮沸三上三下

去滓頓服

又方

凡吐血服桂心末方寸七日夜可二十服

肘後
云亦

暴下

又方

生地黃五斤絞取汁微火煎三沸投白蜜一升

又煎取三升每服半升日三主胸痛百病久服

佳

又方

柏葉一斤以水六升煮取三升分三服

又方

生地黃汁

升半

川大黃末

一方
寸七

右二味先溫地黃汁一沸次內大黃攪和空腹頓

服日三瘥

衍義

吐血起於倏忽且勢緊盛必是肝傷不能藏血乘風木之邪而上湧故用草薺入肝搜風續斷入肝通血引領蟻蝟牛膝王不留行力行迅掃免致閉舍血室而為固疾地黃阿膠牡丹芍藥養正和營麥門冬下通腎氣上達肺津滋而不壅寒而不滯以本經原有治心腹結氣之功也 又方熟艾散陰凝之血 髮灰逐竅邃之瘀 生地黃涼潤止血酒以行之可無疑滯之患 桂心為散不經酒煎可無動血之虞 生地黃投蜜同煎治胸痛諸

病必得鮮者方可絞汁若乾地黃須酒漬搗絞方能行血 柏葉寒而不凝辛而能散不妨少佐生艾欵合金匱成法 生地黃汁得大黃末導之下行少佐乾薑尤得千金妙用

犀角地黃湯

治傷寒及溫病應發汗而不汗之

內畜血及鼻衄吐血不盡內餘瘀血大便黑面

黃消瘀血方

犀角 一兩

生地黃 八兩

芍藥 三兩

牡丹皮 二兩

右四味咬咀以水九升煮取三升分三服喜忘如

狂者加大黃二兩黃芩三兩其人脈大來遲腹不
滿自言滿者為無熱但依方不須有所增加

衍義血得辛溫則散得苦寒則凝此方另開寒冷散血
之門特創清熱解毒之法全在犀角通利陽明以
解地黃之滯猶賴赤芍牡丹下氣散血允為犀角
地黃之良佐裏實則加大黃表熱則加黃芩脈遲
腹不滿自言滿者為無熱但依本方不應則加桂
心此千金不言之祕不覺為之發露

治五臟熱結吐血衄血方

伏龍肝雞子大一枚 生竹茹一升 芍藥

當歸 黃芩 芍藥

甘艸各二兩 生地黃一斤

右八味咬咀以水一斗三升先煮竹茹減三升下

藥取二升分三服翼方有桂心

衍義芎歸芍地斂中寓散更須伏龍肝溫中固本黃芩

竹茹清中散標甘艸和寒熱之性也

當歸湯 治衄血吐血方

當歸 乾薑 芍藥

阿膠各二兩 黃芩三兩

右五味咬咀以水六升煮取二升分三服

衍義阿膠主心腹內崩歸芍歸諸經之血乾薑黃芩以和標本之寒熱也

治上焦熱膈傷吐血衄血或下血連日不止欲死

並主之方

艾葉

竹茹各一升

阿膠如手掌大

乾薑二兩

右四味咬咀以水三升煮取一升去滓內馬通汁半升煮取一升頓服 一方不用竹茹加乾薑作

七兩

又方

取新馬尿與少水和絞取汁服

衍義吐衄日久亡脫已多非薑艾阿膠溫補之劑不能

助馬通搜逐之功竹茹一味專散膈上浮熱也

血虛發熱而脈脫無陽不但竹茹禁用必加乾薑方得固脫之力血熱不勝搜散者單取馬通主之以其能解血中之毒也

治虛勞崩中吐血下血上氣短氣欲絕面黑如漆

方

黃芪

芍藥

芎藭

甘艸各四兩

生薑一斤

右五味咬咀以酒五升浸一宿明日更以水五升
煮取四升分四服日三夜一下陰中毒如湯沃雪
凡夏月不得宿浸藥酒客勞熱發痔下血其穀道
熱者去生薑用生地黄代之凡進三兩劑

衍義虛勞失血而致上氣欲絕亡脫已多雖面黑如漆
必枯癯色天非浮腫淤晦之比故宜黃芪補虛芎
歸和血甘草生薑調和血氣也而生薑痔家無忌
以其辛溫浮長也

竹茹湯 治吐血衄血大小便下血方

竹茹 二斤

甘艸

芎藭

黃芩

當歸 各六分

芍藥

白朮

人參

桂心 各一兩

右九味咬咀以水一斗煮取三升分四服日三夜

一

衍義竹茹黃芩上清虛熱桂心下導虛陽芎歸芍藥引

血歸經參朮甘艸資氣於胃上下失血無不宜之

治九孔出血方

搗荊葉汁酒服二合

一本作荊芥

衍義血從竅出明係風火交煽故用荊葉因勢利導使
風火之邪仍從竅邃而去也

治吐血蟲毒痔血女子腰腹痛大便後出清血者

方

取東向蕤荷根搗絞取汁二升頓服立瘥

衍義蕤荷辛散不獨殺蟲并可以去血中之滯

赤小豆散 諸下血先見血後見便為遠血宜服

黃土湯 方見本門七未仲景方是 先見便後見血此近血宜

服赤小豆散方

赤小豆 三升熬令拆 當歸 三兩

右二味治下篩每服方寸七日三

衍義先便後血血從小腸而溢大腸為丙火淫金之象

故用赤小豆之清熱利水金匱治畜血狐惑之毒

故浸令芽出千金治便後下血故熬令拆佐以當

歸司統握之樞則血有所歸而不致於散漫也

乾地黃丸 治吐血虛勞胸腹煩滿疼痛瘀血往

來臟虛不受穀氣逆不得食補中理血方

乾地黃 三兩 當歸 乾薑

麥門冬 甘艸 黃芩 各二兩

厚朴 乾漆 枳實

防風 大黃 細辛

白朮 各一兩 茯苓 五兩 前胡 六分

人參 五分

蟲蟲

麤蟲 各五枚

右十八味為末蜜丸如梧子大先食服十九日二稍加

衍義

方下補中理血四字則方中諸藥可不言而喻蜜丸日進三服深得峻藥緩攻之妙

麥門冬湯 治凡下血虛極方

麥門冬

白朮

各四兩

甘艸 一兩

牡蠣

芍藥

阿膠

各三兩

大棗

二十枚

右七味咬咀以水八升煮取二升分再服

衍義

下血虛極不用參芪而用牡蠣以固下焦之虛脫并用白朮以培中氣之內陷膠芍養血門冬滋津

甘艸大棗白朮之匡佐耳

鍼灸法

胸中瘀血積滿脇膈痛不能久立膝痿寒三里主之

嘔血肩脇痛口乾心痛與背相引不可咳咳引腎痛

不容主之

心膈下嘔血上管主之

吐血振寒盜乾大淵主之

嘔血太陵及郄門主之

嘔血上氣神門主之

內傷唾血不足外無膏澤刺地五會

虛勞吐血灸胃管三百壯亦主勞嘔逆吐血少食多

飽多唾百病

多唾一作多睡

吐血唾血灸胸堂百壯不可鍼

吐血酸削灸肝膈百壯

吐血腹痛雷鳴灸天樞百壯

吐血唾血上氣咳逆灸肺膈隨年壯

吐血嘔逆灸手心主五十壯

千金翼云太陵是

凡口鼻出血不止名腦衄灸上星五十壯入髮際一

寸是

大便下血灸第二十椎隨年壯

萬病丸散第七

論二首方十三首

論曰聖人之道以慈濟物博求衆藥以備不虞倉卒之際應手皆得故有萬病方焉余以此方散在羣典乃令學者難用討尋遂鳩撮要妙以爲斯品庶使造次可得好事君子安不忘危無事之暇可預和合以備疴瘵也

芫花散

治一切風冷痰飲癥瘕瘡瘡萬醫所不

治者皆治之

一名登仙酒一名三建散翼方名大排風散

掃葉山房

芫花 桔梗 紫苑

大戟 王不留行 烏頭

附子 天雄 白朮

五加皮 蕘花 狼毒

莽艸 俗名魚藥 又名鼠藥 藥荆 栝藋根

躑躅 麻黃 白芷

荆芥 茵芋 各十兩 車前子

石斛 人參 石南

石長生 各七分 蛇牀子 草薺

牛膝 狗脊 菟絲子

菴蓉 秦艸 各五分 藜蘆

薯蕷 薏苡仁 巴戟天

細辛 當歸 芎藭

乾地黄 食茱萸 杜仲

厚朴 黃芪 山茱萸

乾薑 芍藥 桂心

黃芩 吳茱萸 防己

遠志 蜀椒 獨活

五味子 牡丹 橘皮

通草 柴胡 柏子仁

藁本

菖蒲

茯苓

續斷 各二分

右六十四味

翼方無白朮食茱萸有麻花
半夏赤車使者高良薑紫葳

並不治

不擇不炙不熬但振去塵土搗以細羅下之即與服凡是猪雞五辛生冷酢滑任意食之無所忌惟諸豆皆殺藥不得食

藥散 二兩

細麴末 二升

糯米 三升

真酒 五升

先以三大斗水煮米作粥須極熟冬月揚去火氣春月稍涼夏月揚絕火氣令極冷秋稍溫次下麴

末搗使和柔相得重下藥末搗使突突然好熟乃下真酒重搗使散盛不津器中以淨杖攪散經宿即飲直以布蓋不須密封凡服藥平旦空心服之以知為度微覺發動流入四肢頭面習習然為定勿更加之如法服之常常內消非理加增必大吐利服散者細下篩服一方寸匕和水酒漿飲無知稍增以知為度服丸者細下篩蜜丸如梧子每服七丸但此藥或丸或散皆可惟不得作湯若欲得補不令吐瀉但取內消大益勝於五石兼治諸病功效一等然作酒服佳於丸散美而易服流行迅

疾若有患人抱病多時積癥宿食大塊久氣癥痕積聚一切癥結者卽須一兩度增加令吐下泄去惡物盡後少服內消便爲補益凡服藥慎勿早食早食觸藥必當大吐吐亦無損須臾還定但令人咽喉痛三兩日後始瘥服者宜知之平旦服藥至午時待藥勢定宜先食冷飯菹飲冷漿水及午後藥勢一定任意熱食無忌若藥勢未定不得強起行行卽運悶旋倒眼花暗然迷絕此是逐風所致不須疑怪風盡之後縱令多服更佳不然悶時但坐但臥須臾醒然不異於常若定多任意所之若

必便旋當策杖如廁少覺悶亂卽須坐定坐定卽醒醒乃可行病在膈上久冷痰陰積聚癥結疝瘕宿食堅塊咳逆上氣等一切痼結重病終日吐唾逆氣上衝胸喉此皆胃口積冷所致三焦腸間宿冷以成諸疾如此例便當吐却此等惡物輕者一度下轉藥令吐却若重者三五度下之令盡其吐狀法初吐冷氣沫次吐酢水須臾吐黃汁濃甚者若似牛涎病若更多者當吐出紫痰似紫艸汁非常齒斷有此者例入死道不久定死若有症者吐血陳久黑血新者鮮血吐罷永瘥不發下此吐藥

當吐時大悶須臾自定卽不虛發得冷飲食已耳
不虛聳手足不痺若胃口有前件等病勢久成者
正當吐時有一塊物塞胸喉吐復不出咽復不入
當有異種大悶更加一二合藥酒重投藥下少時
卽當吐出塊物如拳大臭似蝦雞子中黃著地以
刀斫碎重者十餘塊輕者三五枚凡人有上件等
病若服藥時不吐却者當時雖得漸損一二年後
還發爲此故須下吐藥欲服取吐者當以春三月
服之春宜吐故也凡膈上冷小腹滿腸鳴膀胱有
氣冷利多者須加利藥於此酒內服之便去惡物

利法出泔涎如清水如黃汁如青泥輕者一兩度
下利藥得利以盡病源重者五度下利藥令頻數
得大利以盡病根利法旦起服藥比至晡時可得
兩三行卽斷後服凡長病人瘦弱虛損者又貴人
此等人但令少服積日漸漸加增令多內消瘥除
久病不加吐利也藥若傷多吐利困極不止者水
服生大豆末方寸匕卽定及藍菜烏豆葉嚼以咽
之登時卽定此據大困時用之小小時不須也凡
在世人有虛損陽衰消瘦骨立者服之非常補益
旬月之間肌膚充悅顏色光澤髓溢精滿與少壯

一等凡衆疴萬病皆除之治一切風病癱節風二
十兩和酒五斗賊風熱風大風上同偏風痕瘰風
癱緩風十二兩和酒三斗此七種並帶熱須加冷
藥押使常數便利賊風掣癱八兩和酒二斗濕風
周痺上同腰攣痛十二兩和酒三斗筋節攣急八
兩和酒二斗重病後汗不流初覺三服一服三盞
年久服一升食熟食如錐刀刺者八兩和酒二斗
口喎面戾一眼不合者初得四兩和酒一斗年久
十二兩和酒三斗頭面風似蟲行又似毛髮在面
上者八兩和酒二斗起卽頭旋良久始定者四兩
和酒一斗心悶嘔逆項强者風在心藏欲風欲雨
便卽先發者八兩和酒二斗因瘡得風口強脊脉
急者五服卽定一服一盞治一切冷病積冷癰瘦
者四兩和酒一斗强者六兩和酒一斗半痰飲疝
瘕上同宿食嘔吐四兩和酒一斗癰瘕腸鳴噫八
兩和酒二斗久疰及久勞上同癰痔塊堅冷嗽上
氣二十兩和酒五斗奔狇冷氣六兩和酒一斗半
噎及冷痢上同卒中惡注忤心腹脹氣急欲死者
三服定一服一盞大吐出鮮血瘴氣上同蠱毒五
服定一服一盞溫瘧瘡瘧並上同可三服一盞永

癸治婦人諸風諸病等並依前件帶下十二兩和酒三斗崩中六兩和酒一斗半月閉不通及冷病不產並上同斷緒不產八兩和酒二斗月水前後不調乍多乍少亦令人絕產四兩和酒一斗產後風冷不產六兩和酒二斗若重者八兩和酒二斗甚者十二兩和酒三斗大重者子宮下垂十六兩和酒四斗

論曰遠覽前古莫覩此方有高人李孝隆者自云隋初受之於定州山僧惠通道人此後用之大有效驗祕而不傳但得其藥其方不可得而聞始吾得之於靜智道人將三紀於茲矣時俗名醫未之許也然比行之極有神驗其用藥殊不倫次將服節度大不近人情至於救急其驗特異方知神物效靈不拘常制至理關感智不能知亦猶龍吟雲起虎嘯風生此其不知所以然而然雖聖人莫之辨也故述之篇末以貽後嗣好學君子詳之非止救物兼深抑亦庶幾於博見也已

衍義 崇古立方有一方專主一病者有一方兼主數病者此方統主萬病而千金隸之膽腑門者以所主諸證風木受病居多所用諸藥祛垢滌痰最猛膽

爲清淨之腑平時委積固疾得此一旦豁然他如
玉壺備急太乙神精紫葛等方同列膽腑無非迅
掃陳積復歸清淨之意而此首主癘風方中烏頭
附子天雄破散堅積乾薑細辛蜀椒蛇牀吳萸食
茱開通濕痺麻黃藥荆躑躅狼毒莽艸茵芋石南
石長生搜逐癘風芫花蕘花藜蘆大戟防已玉不
留行攻利毒水狗脊草薺續斷秦艽石斛五加柏
仁薏苡堅強筋骨獨活藁本白芷荆芥柴胡黃芩
菖蒲桔梗栝蒌根解散風熱桂心牡丹當歸芍藥
芎藭地黃牛膝紫苑流行血脈巴戟遠志菴蓉菟

絲薯蕷山萸杜仲五味滋培腎精白朮厚朴橘皮
茯苓車前通艸健運脾氣人參黃芪鼓舞諸味其
烏附天雄椒黃薑桂之類過烈則以芎歸芍地等
味滋之躑躅狼毒茵芋莽艸之類過劣則以黃芩
桔梗石斛柏子仁等味化之芫花蕘花大戟防已
之類過利則以白朮茯苓薯蕷薏苡等味濡之麻
黃獨活之類過散則以黃芪五味等味收之蛇床
石南巴戟菴蓉之類過補則以車前通艸等味泄
之諸藥之性味雜陳非藉藜蘆細辛芍藥不能激
發人參使之克應孰謂相反不宜並用哉若以人

參爲補益之用殊非立方之意矣但方中茵芋藥
荆蕘花石長生等味近世罕得信夫全璧之難求
也華元化雲母丸子三人九方後有云吾嘗服一
二劑大得力家貧不濟乃止又時無藥足闕十五
味仍得服之可知大劑方中又能拘執其全也觀
翼方方後有加減法二十九條非若萬病丸之一
定不可損益也方以芫花立名性專利水通痺能
殺癘風蠱毒方中風藥最多故翼方名大排風散
方中烏附天雄並用故名三建散以之釀酒能主
癘風言得惡疾卽當棄家修道往往疾愈成仙故

又名登仙酒云

耆婆萬病圓 治七種痞塊五種癩病十種疰忤
七種飛尸十二種蠱毒五種黃病十二種瘧疾
十種水病八種大風十二種瘴痺并風入頭眼
暗漠漠及上氣咳嗽喉中如水雞聲不得眠臥
飲食不作肌膚五臟滯氣積聚不消壅閉不通
心腹脹滿及連胸背鼓氣堅結流入四肢或復
又心膈氣滿時定時發十年二十年不瘥五種
下痢疝蟲寸白諸蟲上下冷熱久積痰飲令人
多睡消瘦無力陰入骨髓便成滯患身體氣腫

飲食嘔逆腰脚酸疼四肢沉重行立不能久婦人因產冷入子藏藏中不淨或閉塞不通胞中瘀血冷滯出流不盡時時疼痛為患或因此斷產并小兒赤白下痢及狐臭耳聾鼻塞等病此藥以三九萬一劑服藥不過三劑萬病悉除說無窮盡故稱為病丸

牛黃

麝香

犀角

桑白皮

茯苓

乾薑

桂心

當歸

芍藥

芍藥

甘遂

黃芩

蜀椒

細辛

桔梗

巴豆

前胡

紫苑

蒲黃

葶藶

防風

人參

硃砂

雄黃

黃連

大戟

禹餘糧

芫花

各二分

蜈蚣

六節

石蜥蜴

一寸

芫青

十四枚

右三十一味

崔氏無黃芩桑白皮桔梗防風為二十七味

並令精細牛

黃麝香犀角硃砂雄黃禹餘糧巴豆別研餘者合擣重絹下篩以白蜜和更搗三千杵密封下破除

日平旦空腹酒服三丸如梧子大取微下三升惡
水爲良若卒暴病不拘平旦早晚皆可服但以吐
利爲度若不吐利更加一丸或至三九五丸須吐
利爲度不得限以丸數病強藥少卽不吐利更非
他故若其發遲以熱飲汁投之若吐利不止卽以
酢飯兩三口止之服藥忌陳臭生冷酢滑粘食大
蒜猪雞魚狗牛馬驢肉白酒行房七日外始得一
日服二日補之得食新米葦根汁作羹粥臠飲食
之三四頓大良亦不得全飽產婦勿服吐利後以
常須閉口少語於無風處溫床暖室將息若旅行
卒暴無飲以小便送之爲佳若一歲以下小兒有
疾者令乳母服兩小豆亦以吐利爲度近病及卒
病皆用多積久疾病卽少服常取微澹利爲度
卒病欲死服三丸如小豆取吐利卽瘥一卒得中
惡口噤服二丸如小豆煖水一合灌口令下微利
卽瘥 諸有痰飲者服三丸如小豆 五疰鬼刺
客忤服二丸如小豆不瘥間日更服三丸 男女
邪病歌哭無時腹大如妊娠服二丸如小豆日三
夜一間食服之 大痢服一丸如小豆日三 猫
鬼病服三丸如小豆未瘥更服 蠱毒吐血腹痛

如刺服二丸如小豆不瘥更服 瘡病未發前服
一丸如小豆不瘥後日更服 冷痺服三丸如小
豆日三皆間食服之常令微溏利 宿食不消服
二丸如小豆取利 癥瘕積聚服二丸如小豆日
三皆間食服之以利瘥止 拘急心腹脹滿心痛
服三丸如小豆不瘥更服 上氣喘逆胸滿不得
臥服二丸如小豆不瘥更服 疝濕以一丸如杏
仁大和酢二合灌下部亦服二丸如小豆 鼻衄
服二丸如小豆即瘥 水病服三丸如小豆日三
皆間食服之瘥止人弱隔日服之 頭痛惡寒服

二丸如小豆覆取汗 傷寒時行服二丸如小豆
日三間食服之 小便不通服二丸如小豆不瘥
明日更服 大便不通服二丸如小豆又內一丸
下部中即通 耳聾聾耳以綿裹一丸如小棗核
大塞之瘥 癰腫丁腫破腫內一丸如麻子大日
一傅其根自出瘥凡丁腫血出以豬脂和傅有孔
內孔中瘥止 胞背腰脇腫以酢和傅腫上日一
易又服二丸如小豆 癩瘡先以酢泔洗後取藥
和豬脂傅之 瘰瘡有孔以一丸如小豆內孔中
兼和豬脂傅之 痔瘡取藥塗綿筋上內孔中日

別易瘥止 瘰癧以酢和傅上瘥 惡刺以一丸
內瘡孔中卽瘥 諸冷瘡積年不瘥者以酢和塗
瘡上作餅貼之瘥 瘡癬先以布指汁出後取酢
和傅上日一易立瘥 蠍螫以少許傅螫處 蜂
螫以少許傅螫處 蝮蛇螫取少許內螫處若入
毒入腹心悶欲絕者服三丸如小豆 婦人諸疾
胞衣不下服二丸如小豆取吐利卽出 小兒客
忤服二丸如米粒和乳汁傅乳頭令啣之 小兒
驚癇服二丸如米粒塗乳頭令啣之 隨兒大
小量與 小
兒乳不消心腹脹滿服二丸如米粒塗乳頭令啣
之不瘥更服

衍義

此方首治七種癩塊五種癩病十種疰忤七種飛
尸十二種瘧疾十種水病八種大風種種諸病方
中牛黃麝臍開關利竅犀角黃連消痰散熱硃砂
雄黃鎮驚豁痰蜈蚣蜥蜴芫青攻毒祛風巴豆芫
花甘遂大戟葶藶破積利水乾薑桂心蜀椒細辛
開痺逐濕芎藭當歸芍藥蒲黃紫苑和血通經桑
皮前胡防風黃芩茯苓桔梗透表達氣人參助諸
藥力禹餘糧固諸藥性其襄搜根剔弊之功凡係
實證便可諒用不必拘以方例等治也予嘗用治

十年二十年痼疾如伏痰懸飲當背惡寒無不神
應肢體沉重腰脚痠痛服之即捷而堅積痞塊雖
未全瘳勢亦大減惜乎世罕知用耳

治一切蠱毒妖邪鬼疰有進有退積聚堅結心痛
如齧不得坐臥及時行惡氣溫病風熱瘴氣相
染滅門或時熱如瘡瘡咽腫塞不下飲食或煩
滿短氣面目時赤或目下赤黃或乾嘔或吐逆
或下赤白痢或熱氣如雲或欲狂走自殺或如
見鬼或手足清冷或熱飲冷水而不知足或使
手掇空或面目癱腫生瘡或耳聾目暗頭項背
脊強不得屈伸或手足卒癢或百鬼惡疰狐魅
走入皮膚痛無常處方

麝香

丹砂

特生礬石

馬目毒公

即鬼

馬齒礬

生成起稜者

雄黃

各一兩

巴豆

九十枚

青野葛

三兩一本不用

右八味為末別搗巴豆如膏合搗五千杵內蜜更
搗一萬杵丸如小豆大强者服二丸弱者一丸入
腹雲行四布通徹表裏從頭下行周偏五臟六腑
魂魄靜定情性得安病在膈上吐膈下利或蛇蟲
諸毒下五色熱水或不吐下便微漸除瘥萬蠱妖

精狐狸鬼魅諸久痼癖塊皆消散在表汗出在裏
直下忌名其藥故此方無名也

衍義

方中丹砂雄黃馬目毒公野葛麝臍皆辟除瘴癘
蠱疰惡毒鬼精之物特生礬石馬齒礬並治堅癖
積聚巴豆蕩練臟腑隨病之表裏上下而為搜逐
無堅不克無投不應洵難以礬稱其實德青野葛
卽是鈎吻其性大毒不用可也

仙人玉壺丸方

雄黃

藜蘆

丹砂

礬石

巴豆

八角附子各二兩

右六味先搗巴豆三千杵次內礬石又搗三千杵
次內藜蘆三千杵次內附子三千杵次內雄黃三
千杵次內丹砂三千杵內蜜又搗萬杵佳若無丹
砂內真珠四兩代之每內藥輒治五百杵內少蜜
恐藥飛揚治藥用王相吉日良時童子齋戒為良
天晴明無雲霧白晝藥成封密器中勿泄氣著清
潔處大人服丸如小豆欲下病者宿勿食平旦服
二丸不知者以粥暖飲發之令下下不止飲冷水
以止之病在膈上吐膈下利或噫氣卽已若欲漸
漸除及將服消病者服如麻子大二丸卒中惡欲

死不知人以酒若湯和二丸強開口灌喉中鬼疰
病百種不可名漿水服二丸日再 男女與鬼交
通歌哭無常或腹大絕經狀如妊娠漿水服二丸
如胡豆大日三夜一又苦酒和令如糝每旦傅手
間使心王心主在手腕後第一約橫文當中指至
暮又傅足三陰三陽及鼻孔七日愈又漿水服麻
子大一丸日三服三十日止 惡風逆心不得氣
息服一丸 腹中如有蟲欲鑽脇出狀急痛一止
一作是惡風二丸 憂恚氣結在胸心苦連噫及
咳胸中刺痛服如麻子大三丸日三 腹痛脹滿

不食服二丸 心腹切痛及心中熱服一丸如麻
子大日三服五日瘥 風疝寒疝心疝弦疝每發
腹中急痛服二丸 卒上氣氣但出不入并逆氣
衝喉胃中暴積聚者服二丸日再 癖飲痰飲平
旦服一丸 腹中三蟲宿勿食明旦炙牛羊肉三
臠食之須臾進三丸如胡豆大日中當下過日中
不下更進二丸爛蟲必下 卒關格不得大小便
欲死服二丸 卒霍亂心腹痛煩滿吐下手足逆
冷服二丸 傷寒嗽澀時氣熱病溫酒服一丸厚
覆取汗不汗更服 寒熱往來服一丸 瘧未發

一丸已發二丸便斷 積寒熱老痞服二丸 癥
堅結痞一丸日三取愈 下痢重下者一丸取斷
食肉不消腹堅脹一丸立愈 若淋瀝瘦瘠百
節酸疼服一丸日三 頭卒風腫以苦酒若膏和
傅之絮裹之 癰疽瘰癧瘰癧及欲作癩以苦酒
和傅之 若惡瘡不可名癩疥疽以膏若苦酒和
先以鹽湯洗瘡去痂拭乾傅之 齒痛綿裹塞孔
中 鼠瘦以猪脂和傅瘡取駁舌狗子舐之 中
水毒服二丸若已有瘡苦酒和三丸傅之 耳聾
膿血汁出及卒聾以赤穀皮裹二丸內之 風目

赤或癢視物漠漠淚出爛眦蜜解如粘塗注日眦
若爲蠱毒所中吐血腹內如刺服一丸如麻子稍
加大如胡豆亦以塗鼻孔中又以膏和通塗腹背
上亦可燒之熏口及鼻 若爲蛇蝮諸毒所中及
獠犬狂馬所咋苦酒和傅又水服二丸 婦人產
後餘疾及月水不通往來不時服二丸日再 婦
人胸中苦滯氣氣息不利小腹堅急繞臍絞痛漿
水服如麻子一丸稍加之如小豆大 小兒百病
驚癇痞塞及有熱百日半歲者以一丸如麥米大
置乳頭飲之一歲以上如麻子一丸日三飲送下

小兒大腹及中熱惡毒食物不化結成積聚服
一丸 小兒寒熱頭痛身熱及吐覘服一丸如麻
子大 小兒羸瘦丁奚不能食食不化漿水服二
丸日三又黃酒和如梧子大傅腹上良 一切萬
病量之不通一二丸莫不立效

衍義

辟除惡毒之藥非猛力峻攻無以建克敵之功方
中雄黃治寒熱死肌殺精物惡鬼邪氣勝五兵附
子治風寒痿躄破癥堅積聚藜蘆治蠱毒泄利殺
蟲毒去死肌丹砂治身體五臟百病養精神安魂
魄殺鬼精惡物礬石治寒熱風痺腹中堅癥

邪氣巴豆破癥瘕積聚堅積畱飲蕩練五臟六腑
開通閉塞除蠱毒鬼疰邪物種種皆辟除邪毒峻
藥無不本諸本經治宿患痼疾確有五兵蕩練之
勤而方後有無丹砂真硃代之說真朱卽礬紅
取其滌除積垢以安神識也

張仲景三物備急圓 司空裴秀爲散用治心腹
卒暴百病方

大黃

乾薑

巴豆

各等分

右皆須精新多少隨意先搗大黃乾薑下篩爲散
別研巴豆如脂內散中合擣千杵卽爾用之爲散

亦好用蜜爲丸貯密器中莫令歇氣若中惡客忤
心腹脹滿刺痛口噤氣急停屍卒死者以暖水若
酒服大豆許三枚老少量與扶頭起令得下喉須
臾未醒更與三枚腹中鳴轉得吐利便愈若口已
噤可先和成汁傾口中令從齒間得入極良

衍義此本金匱雜療之方千金收入膽腑門者膽爲清
淨之腑用以滌除穢垢中精自寧方中乾薑溲濕
安中巴豆攻堅破積大黃推陳致新膽無出內可
無傷精之患且無濁惡混擾之虞千金以此方收
入此門良有見乎此也

大理氣圓 治萬病方

| | | |
|--------------------|--------------------|-------------------|
| 牛膝 | 甘草 | 人參 |
| 茯苓 | 遠志 | 恒山 |
| 苦參 | 丹參 | 沙參 |
| 龍膽 | 龍骨 | 牡蒙 |
| 半夏 | 杏仁 | 紫苑 |
| 芍藥 | 天雄 | 附子 |
| 葛根 | 橘皮 | 巴豆 |
| 狼牙 | 大黃 | 牡蠣 |
| 白朮 | 生薑 | 白薇 |
| <small>各二兩</small> | <small>末五兩</small> | <small>六分</small> |

元參 七分

藿蘆 大者一枚

右二十九味先搗篩二十七味令熟次搗巴豆杏仁如膏然後和使相得加白蜜更搗五千餘杵丸如梧子大空腹酒服七丸日三疝癥瘕結五十日服永瘥吾常用理氣大覺有效

衍義

理氣者理正氣之不足邪氣之有餘也方中參苓朮甘安胃氣天雄附子助腎氣丹參遠志通心氣牛膝紫苑芍藥和血氣半夏恒山橘皮生薑豁痰氣葛根杏仁白薇散風氣巴豆大黃狼牙藿蘆下積氣龍膽牡蒙苦沙元參除旺氣龍骨牡蠣收津

勢耳 氣九氣各得以平全在烏附半夏之反激以助其

大麝香圓 治鬼疰飛尸萬病方

麝香 三分

礞石 八分

牛黃

附子

鬼臼

真珠

莽艸

犀角

礞石

細辛

桂心

獺肝

藜蘆 各二分

雄黃 一兩

丹砂 二兩

蜈蚣

蜥蜴 各一枚

巴豆

杏仁 各五枚

芫青

地膽

外臺作蝮蛇膽

千金方衍義卷三

三

掃葉山房

亭長

盤螯 各七枚

右二十三味為末蜜和合更搗三千杵丸如小豆大飲服一九日再漸加至三九蟲毒所螫摩之以知為度若欲入毒瘦癘鄉死喪病處及惡鬼塚墓盛絳囊中男左女右肘後繫之又以少許傅鼻下人中及臥不魘

衍義 玉壺丸中加入盤螯地膽芫青亭長蜈蚣蜥蜴獺肝以攻毒邪犀角牛黃麝香真珠以和藥毒杏仁細辛莽艸桂心礬石鬼臼以佐玉壺丸中六味并毒蟲野獸之藥其襄厥功

小麝香圓 治同前

麝香

莽艸

犀角

梔子仁 三分

雄黃

當歸 外臺不用

丹砂 各四分

乾薑

桂心

芍藥

細辛 各五分

附子

烏頭 各五枚

蜈蚣 一枚

巴豆 五十枚

右十五味為末蜜和合搗千杵丸如小豆大服三九日三可加至五九一切尸疰痛悉皆主之

衍義 大麝香丸專辟飛尸鬼疰惡毒不祥故須猛藥峻攻小麝香丸治證雖同然不若前證之癘但需烏

頭乾薑以助丹雄犀麝桂附巴莽之祛風逐痺原
無藉於辟除蠱疰故無取於獺肝牛黃蜥蜴斑貓
等味

紫葛圓 治寒熱不調方

紫葛 石膏 人參

丹參 紫參 苦參

元參 細辛 齊鹽

代赭 菴蓉 巴豆

烏頭各三分 乾薑 桂心

獨活各五分

右十六味為末蜜和更搗萬餘杵丸如小豆服六
丸食前三丸食後三丸忌五辛猪雞魚蒜餘不在
禁限若覺體中大熱各減一丸服之令人肥悅好
顏色強陽道能食服藥後十日得利黃白汁大佳
婦人食前食後只服二丸兩歲以下小兒服丸如
米粒大令人能飲酒除百病藥之功能損益備述
如左

腹中積聚心腹滿 心下堅 痰飲 宿食 食
吐逆 上氣 短氣 咳嗽 咽喉鳴 黃瘰
久瘧 面腫 身浮腫 四肢煩重 坐起體重

熱病濕蘊下部癢 體瘡癢 關格不通 大
腸出 熱淋 下利 顏色不定羸瘦無力弱房
少精 精冷 身體斑駁 從高墮下絕傷 墮
胎後傷損血 皮肉焦爛 月水不定或後或前
月水斷心下悶滿肩膊沉重 小兒百病 小
兒癖氣 乳不消 小兒身常壯熱腹內有病所
錄諸病皆紫葛圓治之若積日服餌未愈消息準
方服之取瘥止

衍義紫葛丸治寒熱不調而為方後諸病故用巴豆薑
桂烏頭以破寒積紫葛石膏石鹽苦紫丹元匹參

以散熱結獨活細辛以通經絡代赭治賊風鬼疰
蠱毒菴蓉止莖中寒熱痛人參以助諸藥之力但
紫葛藥肆罕得宜以紫苑代之以本經專主胸中
寒熱結氣也耆婆萬病丸中用之亦取散結之義
太乙神精丹 治客忤霍亂腹痛脹滿尸疰惡氣
癲狂鬼語蠱毒妖魅温瘧但是一切惡毒無所
不治方

丹砂

曾青

雌黃

雄黃

磁石

各四兩

金牙

二兩半

右六味各搗絹下篩其丹砂雌黃雄黃三味以醮

醋浸之會青好酒於銅器中漬紙密封訖日中曝
百日經憂急五十日亦得無日以火煖之然後各
研令如細粉以醱醋拌使乾濕得所內土釜中以
六一泥固濟勿令泄氣乾後安鐵環施脚高一尺
五寸置釜上以漸放火初放火取熟炭兩秤各長
四寸置釜上待三分二分盡卽益如此三度盡用
熟火然後用益生炭其過三上熟火已外皆須加
火漸多及至三伏時其火已欲近釜卽便滿就釜
下益炭經兩度卽罷火盡極冷然後出之其藥精
飛化疑著釜上五色者上三色者次一色者下雖

無五色但色光明皎潔如雪最佳若飛上不盡更
令與火如前以雄雞翼掃取或多或少不定研和
棗膏丸如黍粒治偏風大風惡疾癩癧癰瘡等最
良服法平日空腹一丸爲度其瘡病積久百方不
瘥又加心腹脹滿上氣身面脚等並腫垂死者服
一丸吐卽瘥亦有不吐瘥者若不吐復不瘥者更
服一丸半仍不瘥者後日增半丸漸服無有不瘥
氣亦定當吐出青黃白物其因瘡兩脇下有癖塊
者亦當消除若心腹不脹滿者可與一丸日日加
之以知爲度不必專須吐亦可一丸卽瘥勿併與

服亦可三日一服皆須以意斟酌量得其宜或腹
內有水便卽下者勿怪若患瘧日近精神健亦可
斟酌病人藥性併與兩丸作一丸頓服之皆至午
後食勿使冷勿使熱豉漿粥任意食之若病瘧盜
汗虛弱者日服一九至三日吐卽止若患瘧不汗
氣復不流脚冷者服一九至三日若不汗氣復脚
卽煖有閉汗不至三日吐卽止若患瘧無顏色者
服藥後三日卽有顏色亦有須吐瘧者亦有服少
許而瘧者亦有殺藥強人服三四丸始覺藥行者
凡人稟性不同不可一槩與之但作黍米大服之

爲始漸加以知爲度藥力險壯勿併多服特慎油
麩魚肉蒜當清淨服之若有患久不瘧在牀羸瘦
并腹脹滿及腫或下痢者多死但與藥救之十人
中或瘧三四人也瘵瘵積聚服一刀圭以漿水送
下諸卒死中惡客忤霍亂腹滿體滯五尸淫惡風
疰忤大病相易死亾滅門狂癲鬼話已死氣絕心
上微煖者扶起其頭以物校開口不可開琢去兩
齒以漿飲送藥藥下卽活諸久病者日服一刀圭
覆令汗汗出卽愈不愈者不過再服亦有不汗而
瘧復有不汗不愈者服如上法加半刀圭以瘧爲

度常以絳囊帶九刀圭散男左女右小兒繫頭上
辟瘴毒時氣射工小兒患可苦酒和之塗方寸紙
上著兒心腹上令藥在上治之亦有已死者冬二
日夏一日與此藥服得下藥便活若不得入腹不
活加金牙磁石者服至五服內必令人吐逆下利
過此卽自定其藥如小豆大爲始從此漸小不得
更大大風惡癩可二十服偏風癱節諸惡風癩病
等亦可二十服自餘諸惡者皆止一二服量人輕
重弱強不得多與若欲解殺藥但爛煮食肥猪肉
服此藥後小應頭痛身熱一二日來大不能得食

味後自漸得氣味五日後便能食若貪食過多者
宜節之若服藥下悶亂可煮木防已湯服之卽定
凡言刀圭者以六粟爲一刀圭一說云三小豆爲
一刀圭

作土釜法

其法取兩箇瓦盆以甘土塗其內令極乾其狀
大小隨藥多少

作六一泥法

赤石脂

牡蠣

滑石

礬石

黃礬

鹵土

蚯蚓屎

各一兩

右取醱酢以足爲度若無鹵土以鹽代之先作甘土泥以泥各別裏前黃礬等五種作團裏之勿令泄氣以火燒周三日最好一日亦得出火破團取藥各搗碎絹篩然後與蚯蚓屎鹵土等分以酢和之如稠粥既得好酢可用二分酢一分水和用取前五盆以此泥塗之曾青如蚯蚓屎如黃連佳世少此者好崑崙礞亦得瘥病丹砂亦尠粟砂亦得舊不用磁石金牙今加之 凡雄黃皆以油煎九日九夜乃可入丹不爾有毒慎勿生用

衍義

石藥之用有三曰壯陽助火曰清熱解毒曰辟惡祛邪此方純用石藥專爲辟除邪毒而設方中丹砂統治身中五臟百病養精神安魂魄益氣明目殺精魅久服通神明曾青主風痺利關節通九竅破癥痕積聚雄黃殺精物惡鬼邪氣百蟲蠱毒雌黃治惡瘡毒蟲身癢邪氣磁石療周痺風濕肢節中痛不可特物金牙辟鬼疰蠱毒筋骨攣急腰脚不遂上五味皆本經主治金牙乃別錄與甄權所主但曾青殊不易得詳六一泥下有崑崙礞可代曾青之說崑崙礞卽是石綠產廣西崑崙山者佳

故名與空曾二青同出銅穴相挾帶出蘇頌言吐
風痰甚效功用可代曾青載攷金牙專主瘴癘蠱
毒尸疰風痺故大小金牙散大小金牙酒咸以名
方而真贗莫辨予擬消石代之崔昉本艸云金牙
陽石也徐之才言消石為天地至神之物本經治
百病除寒熱邪氣六腑積聚固結留癖能化七十
二種石其純陽辟除陰毒之性不在金牙之下但
本經所主綱目誤列朴消之下而別錄言療五臟
十二經脈百二十疾能化七十二種石正與本經
符合用以治方下諸病綽有餘裕藥雖異而功不

殊也

倉公散 治卒鬼擊鬼疰鬼刺心腹痛如刺下血

便死不知人及臥魘嚙脚腫不覺者諸惡毒氣

病方 此漢文帝時太倉令淳于意方故名

特生礬石 皂莢 雄黃

藜蘆 各等分

右四味治下篩取如大豆許內管中吹入病人鼻
得嚏則氣通便活若未嚏復更吹之以得嚏為度
此藥起死回生

衍義吹鼻取嚏此方最神中惡卒疰非此不治方中與

石能伏水銀專破堅結皂莢能通關節利九竅雄
黃殺精物邪氣百蟲蠱毒藜蘆治惡瘡去死肌配
合修製用以通利關竅確有起死回生之功世醫
但知稀涎散瓜蒂散及頭風搐鼻等法披讀此方
惟有舌橋目眩而已

小金牙散 治南方瘴癘疫氣脚弱風邪鬼疰方

金牙 五分 雄黃 草薺

黃芩 蜀椒 由跋

桂心 莽艸 天雄

硃砂 麝香 烏頭 各二分

牛黃 一分 蜈蚣 一枚六寸者 細辛

蕨蕤 犀角 乾薑 各三分

黃連 四分

右十九味治下節合牛黃麝香搗三千杵温酒服
錢五七日三夜二以知爲度絳囊盛帶男左女右
一寸七省病問孝不避夜行塗人中晨昏霧露亦
塗之

大金牙散 治一切蠱毒百疰不祥醫所不治方

金牙 鸛骨 石膏 各八分

斑蝥 七分 活草子 胡燕屎

白朮

雷丸

龍牙各六分

銅鏡鼻

梔子仁

乾漆

龜甲

鱉甲

鬼督郵

桃白皮

大黃各四分

桂心

芍藥

徐長卿

羚羊角

射干

升麻

鳶尾

馬目毒公

蜂房

細辛

乾薑

芫硝

由跋

犀角

甘艸

狼毒

蜈蚣

龍膽

狼牙

雄黃

真珠各三分

芫花

莽草

射罔

烏梅各二分

蛇蛻皮一尺

鐵精

赤小豆一合

地膽

樗鷄

芫青各七枚

桃奴

巴豆各二枚

右五十味治下篩服一刀圭稍加至二刀圭帶之

辟百邪治九十九種疰一有麝香無白朮

衍義金牙散二方與前金牙酒藥品迥殊而功用彷彿

小金牙散專主瘡癘脚弱故用烏頭天雄蜀椒細辛乾薑桂心由跋莽艸開發瘡癘犀角牛黃黃芩

黃連葳蕤草薜化熱通痺硃砂雄黃麝香蜈蚣匡
佐金牙其建逐痺祛疫之功剛柔兼濟而脚弱自
除矣 大金牙散專主蠱毒百症純是大辛大烈
以毒攻毒之藥射罔射干由跋鳶尾芫花莽艸督
郵長卿馬目毒公專治蠱症斑蝥樗鷄芫青地膽
蜣螂乾漆專破毒血巴豆雷丸狼毒狼牙苾硝大
黃龜甲鱉甲專攻內結龍牙真硃雄黃鐵精鏡鼻
蛇蛻蜂房燕屎桃奴桃皮專辟疫邪犀角石膏膽
草梔子赤小豆專解熱毒鸛骨羚羊專利筋骨乾
薑桂心細辛白朮甘艸升麻芍藥烏梅專利氣血

協輔金牙爲蕩滌蠱症之主帥遡洄窮源總不出

如上等法

其後飛尸鬼疰門中又有金牙散一

方

見五十六卷

與大金牙散之藥同者過半如彼用狸

骨此用鸛骨彼用亭長此用地膽彼用烏頭此用

射罔藥雖稍變而功用則一況乎複劑屢見如狼

毒狼牙射干鳶尾之類奚必按方全用哉 其治

八風五疰彈曳跛躄用金牙酒

見二十五卷

治瘴癘毒

氣風冷濕痺拘攣脚氣用大金牙酒

見二十四卷

方中

諸藥與二散所同無幾而主療之證不甚相遠可
見臨病處方但當師古聖之意取古方之法隨機

應變不必拘守成則也大匠與人規矩三隅之反不在方圓之外耳

孫真人千金方衍義卷十二

終

